

HEADLINES (MORNING)

Date – 24/10/2024

Time - 7:30 -7:40Hrs

- Larsap Dr. Hari Babu Kambhampatian ramchhung inpumkhatna leh hnam ziarang inhriatpawhtawna leh chawilarna 'Bharat Ko Jano' campaign chu tun aia zau zawka kalpui a ngai a ti.
- Karnataka sorkar Revenue Department kalphung zirchiang tura kal Land Revenue and Settlement Minister Pu B.Lalchhanzova chuan nimin khan Karnataka Revenue Minister Pu Krishna Byre Gowda a kawm.
- Prime Minister Narendra Modia chuan India leh China inkara ngaihndan hrang leh inhniaalna awm thin chu tha taka chinfel a pawimawh a ti.
- BRICS Summit Russia-a Kazan khawpuia neih zawh tak chuan Kazan Declaration pawmin UN siamthat an duh thu an sawi.



BHARAT KO JANNO

Larsap Dr. Hari Babu Kambhampati chuan India rama hnam hrang hrangte inpumkhatna leh hnam ziarang inhriatpawhtawna leh chawilarna 'Bharat Ko Jano' campaign chu tun aia zau zawka kalpui a nih theih nan theihtawp chhuah a ngai a ni a ti.

Nimina North East Zone Cultural Centre (NEZCC), Dimapur, leh Art & Culture Department, Mizoram tangkawp buatsaiha Bharat Ko Jano programme Vairengte Jt. YMA Playground-a a hmanpuinaah he thu hi a sawi a. Larsap chuan Nagaland Governor Pu La. Ganesan, NEZCC Chairman ni bawh hmalaknaa Mizoram luhka khaw pawimawh tak Vairengtea Bharat Ko Jano program hman a ni chu lawmawm a tih thu a sawi a. Ramri dep Vairengtea chengte chu remna leh muanna vawnnun kawnga mawhphurhna pawimawh tak nei an nih thu sawiin, muanna, rinawmna leh mikhual chungah that chhuah kawnga Mizoram dinhmun chawinungtute an ni, a ti.

Nagaland Governor Pu La. Ganesan pawhin thu sawiin thawhhona thain inlungrualna, theihna nasat zia leh hnam ziarang hausakna a pholan thu a sawi a. North East India chu India tana chetlak vel nana hmun pawimawh tak a nih bakah India ram hnam ziarang hrang hrang awmna leh India chanchina thil pawimawh tam tak thlenna leh awmna hmun a ni, a ti.

Bharat Ko Jano Programme-ah hian Mizoram, Assam, Tripura leh Bihar atangin lamthiamte'n hnam lam chi hrang hrang an entir a ni.



SOCIAL WELFARE MINISTER

Social Welfare, Tribal Affairs, Women & Child Development Department Minister Pi Lalrinpuui chuan kum upate tanpuina sorkar laipui leh Mizoram sorkar tang dunin a pek kalpui dan tur zirna nimina Aizawla buatsaih chu a hmanpui a,

NSAP-PPS on-boarding Programme-ah hian Ministry of Rural Development lam atangin official engemawzat an rawn kal a ni. NSAP hnuai chhawmdawlina dawng thei tur hian India khua leh tui tupawh Sorkar-in Below Poverty Line (BPL) chhungkua an ni ngei a ni tih a hriatpui te nih a ngai a. NSAP hnuai a Pension-te hi Central Sorkar hmalakna bakah Mizoram Sorkar hmalakna tangkawp a chhawmdawlina pek a ni a, Mizoram Sorkar-in kumin Sorkar kum thar 2024-2025 atangin tunhma a chhawmdawlina Rs. 100 ni thin chu Rs. 1000 ah a tisang a. Mizoram Sorkar in chhawmdawlina a pek bik Rs. 1000 hi pension dawngtu te hnenah

Kum 2024-2025 atan hian April atanga September thla thleng semchhuah tawh a ni bawk.

NSAP hi Mizoram Sorkar hnuaiiah Social Welfare & Tribal Affairs Department hi Nodal Department niin Ministry of Rural Development hmalakna pawimawh leh thleng thui ber te zing a mi a ni mek a ni.

Kum 1995 August ni 15-a Central Sorkar in NSAP a din tan atangin Mizoram ah pawh hlawhtling taka kalpui mek a. IGNOAPS hnuaiiah hian Mizoram bikah tunah hian chhawmdawlina dawng Tar Pension latu mi 25,213 an awm mek a, Widow Pension hnuaiiah chhawmdawlina dawngtu 2310 awm leh in Rualbanlote Pension Indira Gandhi National Disability Pension dawng mek tu mi 742 an awm mek bawk.



BANA KAIH

Lunglei District Agricultural Marketing Committee (DAMC) huaihawtin nimin khan Lunglei DC Conference Hall-ah mipuite khawsak chawi kan nana Mizoram sawrkar ruahmanna thar, Mizoram Bana Kaih (Handholding) Scheme hnuaiia thlai thar zawrh leh hralh kalpui dan tur zir ho a ni.

He hun hmanpuitu DAMC Chairman, Lunglei District Bawrhsap Pu R. Lal̄thazuala chuan Lunglei DAMC bul țanna turah Mizoram Agricultural Marketing Board (MAMB) lamin an uap thei chu lawmawm a tih thu a sawi a. An kaihhruainain DAMC pawhin a tih tur tluang taka a kalpui theih a beisei thu a sawi a. Bana Kaih chu Mizoram sawrkar ruahmanna pawimawh tak a nih angin hlawhtling taka kalpui a nih theih nan member-te'n ngaihtuahna seng tlang tura chahin, kut hna thawktute leh hma thar latute bana kaih bakah, an mamawh anga kaihhruaina pek leh thlai thar hralhna ngaihtuapui kawngah te mahni zawnah țeuh theih tawp chhuah turin a chah a ni.

He hunah hian MAMB member, Dr Robert Lalrinsanga, Deputy Director, Horticulture Department chuan Bana Kaih scheme hnuaiia thlai thar chhuah chi li - sawhthing, aieng, hmarcha leh hmunphiah lei leh hralh (market) kalpui dan tur ruahmanna a sawi fiah a. MAMB co-opted member & DAMC member Pu Daniel Lalawmpuia'n thlai thar lei leh hralh chungchanga hriat tur pawimawh hrang hrang a tar lang bawk a ni.

He hun hi Mizoram Agriculture Marketing Board (MAMB) member-te'n telpuiin, district office hrang hrang aiawhte an tel a. BDO-te leh line department hrang hrang block office lamte'n online-in an chhim bawk a ni.



SUPPLY MINISTER

Karnataka sorkar hnuaiia Revenue Department kalphung zirchiang tura kal Land Revenue and Settlement Minister Pu B.Lalchhanzova chuan nimin khan Karnataka Revenue Minister Pu Krishna Byre Gowda chu a pisaah a hmu.

Minister hian Karnataka Revenue Minister chu state pahnihte inlaichinna ti chak tura thawhpuiiah a sawm a. An sawrkar tirh atanga an lo ruahman tawh tih hlawhtlin a ni chu a lawmthu sawiin Minister chuan Karnataka state chu India ram state zinga land revenue administration nei tha leh technology thar hmang tangkai ber te zing ami anih anga tlawh an nih thu a sawi a. Minister chuan Mizoram Land Revenue department-a thawktuten theihtawp chhuah thin mahse an set up leh kalphung a fuh tawk lo lai te siamthat zel a tul thu sawiin India rama helama a hmahruaitu, Karnataka State tlawh a pawimawh thu a sawi a, Mizoram atanga kal ten thil tha tam tak an zir chhuah theih a beisei thu a sawi a ni.

Mizoram atana Revenue department zirchiang tura kal te hi Inrinni thlengin Karnataka sawrkar hnuaiia Revenue department kalphung leh tih dan tha hrang hrang te lo zirpuiin field visit te an neih pui dawn a ni.



SAITUAL DC

Saitual DC Conference Room-ah Nasha Mukht Bharat Abhiyaan Committee chu District Bawrsap Dr. Lalngura Tlau kaihhruaiin nimin khan an thukhawm a, ruihhlo do kawnga hmalak dan tur hrang hrangte ngaihtuahin an thukhawm.

Dr. Lalngura Tlau chuan Natasha Mukht Bharat Abhiyaan(NMBA) chu Drug Free India tih a nih angin ruihhlo hman sual kawnga theihtawp chhuah turin kalkhawmte a sawm a, hmalakna kawng hrang hrangah pawh district huap rilru zau tak pu turin a chah bawk. Chairman chuan drugs chungchang sawiin tangkai taka hman a nih chuan nuna chhan nan leh kawng tinrenga tangkai taka hman theih a nih laiin hman sual a nih erawh chuan nunna tam tak latu leh khawtlang leh ram tluk chhiatna a ni thei a ni, a ti .

He thutkhawmah hian NMBA scheme hnuaiia ruihhlo dona atana hmalak dan tur hrang hrangte sawiho niin chung zingah chuan district chhunga school hrang hrang 10 thlanchhuahte atanga Anti-Dugs Club din leh chung school atanga Master Volunteers 50 training pekte, ruihhlo dona atana tlawmngai pawlte leh kohhran thalaite hnena awareness neihte, short clip video leh reels insiamsiak buatisaihte, November ni 14 Children’s Day denchhena district pum huapa “Drug Prevention Awareness” neih te an rel a ni.



MSPMC

Mizoram State Project Monitoring Committee chuan Aizawl High Field Ground sak mek chu an tlawh a. He hna hi Aizawl Smart City Ltd. hnuaiiah Lushai Engineers, Ramhlun South, Aizawl ami te thawh mek a ni a. He hna hi nikum February ni 4 ah thawh tan niin thla sawmpariat (18) chhunga zawh tura tih a ni.

Hnathawh mek a nih laia harsatna hrang hrang avangin hna thawh zawh hun tur hi a tira tuk aiin a tlai hret dawn a, kumin December thla ah chuan zawh tum a ni. A tira sanction zat chu cheng nuai 1627.71 a ni.

Tunah hian hna zaa 50 chuang hret thawh tawh a ni a. Hna hi chak lehzual a thawk turin a enkawltu Aizawl Smart City Ltd. hotute leh Contractor te hi an inruahman fel thawkhat tawh a ni. Hnathawh tawh chin hi a tha thawkhat in MSPMC chuan a hre bawk. Mizoram State Project Monitoring Committee Inspection

A hmunah hian hna inspection neih zawh ah hna chungchang sawihona tha tak neih zui a ni bawk.



PM -BRICS

Prime Minister Narendra Modia chuan India leh China inkara ngaihdan hrang leh inhniaalna awm thin chu tha taka chinfel a pawimawh a ti. Nimina Chinese President XI Jinping nen BRICS Summit neih kara an inbiaknaah Pu Modi chuan he thu hi a sawi a. Ram pahnih hruaitute hian India-China ramria zawhna awm thinte sawifel turin ram pahnih aiawh Special Representative te a hma lama inbiak nise an ti a, ramriah remna leh muana a awm theih nan leh ram pahnihten lungawi taka an pawm theih turin ramri buai chinfel dan ngaihtuah se an ti bawk.

Sawrkar laipua Foreign Secretary Vikram Misri chuan ram pahnih hruaitute chuan tunhnaia inremna siam a ni chu lawmawm an tih thu an sawi ve ve a ti a. Ram pahnihte hian Special Representative ten buaina chinfel kawngah dinmun pawimawh tak an luah tur thu an pawm ve ve a ti bawk.

Prime Minister Narendra Modia chuan BRICS ramte chu firfiaka chetna leh sum hmanga puihna do turin inpumkhat leh thawhhona tha nena thawk turin a sawm. Vawina BRICS Summit vawi 16-na Kazan-a neihah he thu hi sawiin Pu Modia chuan hmai thinghawng vuah chung firfiak do thin an awm chu a demawm a tih thu sawiin thalaite zinga firfiaka chetna hluar chho mek chu ven a ngai a ni a ti a. UN-a firfiakte dona tur ruahmanna Comprehensive Convention on International Terrorism chu a taka tihhlawhtlin a hun tawh thu a sawi bawk a ni.

Hei bakah hian Pu Modia chuan cyber security atan khawvel huap dan tha tak neih a tul thu sawiin AI him leh tha taka hman dan ngaihtuah a ngai a ti bawk.

Prime Minister Narendra Modia hian BRICS Summit a hman zawh hian nizan khan thuang takin New Delhi a lo thleng leh a ni.

<><><>

DG

Akashvani Neews Director General hlui Pu P.K Bandyopadhyay chu nimin khan lung na avangin Kolkatta ah a thi. Pu Bandyopadhyay hi Indian Information Service Officer niinhun rei tak AIR News ah a thawk a. Hei bakah hian Press Information Bureau leh Union Information and Broadcasting hnuuia media hrang hrangah a thawk tawh bawk a ni.

<><><>

PRIYANKA GANDHI

Kerala-a Wayanad Parliament bial inthlan that chuh turin Congress hruaitu Priyanka Gandhi chuan nimin chawhnu khan Returning Officer hnenah nomination a thehlut.

Wayanad ah hian thla leh ni 13 ah inthlan a ni dawn a. Hei bakah hian Chelakkara leh Palakkad Assembly bialahte inthlan that a ni dawn bawk a. Kan correspondent sawidanin Priyanka Gandhi hian inthlan a chuh ve vawikhatna a ni a. Vawiin khan Kalpetta khuaah mipui tam takin an lo hmuak a. Lok Sabha Opposition Leader Rahul Gandhi leh AICC General Secretary K C Venugopal bakah Congress hruaitu senior ten an tawiawm a ni.

<><><>

BRICS

BRICS Summit Russia-a Kazan khawpuia neih zawh tak chuan Kazan Declaration pawmin UN siamthat an duh thu an sawi. BRICS hruaitute hian UN bakah khawvel huap ram hrang hrang inzawmkhawmna pawl dangte pawh siamthat an duh thu an sawi a. Sawrkar laipua Economic Relations Secretary Dammu Ravi chuan hemi chungchang hi chanchinbumite a kawmnaah sawiin declaration ah chun UN Security Council a member nghet dah belh an an duh thu tarlan a ni a. Sum leh pai lama thawhhonah pawh inremna siam a ni bawk.

<><><>